

Kako sam naučio arapski jezik?

Uvod

الحمد لله رب العالمين والصلاة والسلام على رسوله الكريم وعلى آله وصحبه أجمعين

Potpuno razumijem sve što učim iz Kur'ana, hvala Allahu. U nastavku slijedi tekst koji opisuje kako sam naučio arapski jezik – u svojoj sobici, u jednom malom gradiću Bosne, bez učitelja... Pročitaj cijelu priču do kraja.

Napomena o početku

Sufara (arapsko pismo) i tedžvid (ispravno učenje Kur'ana) su temelj koji se mora savladati uz prisustvo stručne osobe. Tek nakon što se ta osnova usvoji, gramatika, morfologija i vokabular arapskog jezika mogu se učiti samostalno, ali uz ozbiljan trud i organizovan pristup.

O validnosti znanja bez diplome

Tokom pet godina samostalnog učenja sam se samo nekoliko puta javio profesoru arapskog, i to kada sam analizirao složenije rečeničke konstrukcije. Možda će neko postaviti pitanje: "Kako znaš da si ispravno naučio? Ko ti je to znanje potvrdio?" Ako ti je cilj postati profesor arapskog jezika – diploma je neophodna. No, ne moramo svi biti profesori. Hvala Allahu, svoje znanje mogu praktično primjenjivati – pišem, čitam, razumijem i komuniciram na arapskom jeziku.

Dova i ispravna namjera

Najvažnije je da tražiš od Uzvišenog Allaha da ti olakša put učenja i da ti podari istinsko razumijevanje arapskog jezika, kao i svega drugog što radiš u životu.



Zašto učiti arapski?

Učenje arapskog jezika je od presudne važnosti za svakog muslimana, jer upravo kroz arapski razumijevamo izvor naše vjere – Kur'an i sunnet. Posebno je važno onima koji žele učiti hifz, jer će se tada svakodnevno susretati s tekstom Kur'ana, a znati značenje donosi dublju povezanost s Allahovom riječju.

Za svakog muslimana, poznavanje arapskog jezika otvara vrata prema istinskom razumijevanju ibadeta, ahlaka i islamskog načina života. To nije samo jezik riječi, već jezik duše i srca. Kad razumiješ arapski, Kur'an postaje živa stvarnost, a namaz, zikr i dova dobijaju posebnu dimenziju. Zato je ulaganje vremena i truda u učenje arapskog ključno za svakog ko želi produbiti svoju vjeru i približiti se Allahu.

Preporučeni program – Medinske knjige

Najbolji program za učenje arapskog jezika je tzv. medinski program, posebno prilagođen nearapskim govornicima. Nabavi četiri medinske knjige u izdanju Alima Hasanagića, koji je uz njih priložio izvanredan komentar na bosanskom jeziku.

Ako ih uspješno završiš:

- poznavat ćeš kompletnu gramatiku arapskog jezika,
- usvojiti ćeš oko 2000 riječi iz Kur'ana, sunneta i svakodnevnog govora,
- razumijet ćeš Kur'an, sunnet i namaz, i uživati ćeš u svakom momentu učenja i ibadeta,
- osjećati ćeš kako ti Allah šalje poruku kroz Kur'an – često baš u vezi s tvojim trenutnim stanjem,
- razviti ćeš sve četiri jezičke vještine: pisanje, čitanje, razumijevanje i komunikacija.

Video komentari koje sam slušao:

Prva i druga knjiga	Alim Hasanagić
Treća knjiga	Irfan Omerčić
Četvrta knjiga	Michael Deonarain (@KeysToKnowledge)

Ovaj program sam samostalno prelazio svakodnevno, lekciju po lekciju, uz kontinuitet i disciplinu. Video-komentar jedne lekcije u prosjeku traje oko pola sata, nakon čega sam na istoj lekciji ostajao i do pet sati, tražeći i učeći nepoznate riječi, rješavajući zadatke i samostalno primjenjujući naučeno.

Koliko traje učenje?

Potrebno je nekoliko godina da se ozbiljno ovlada arapskim. Odredi sebi konkretno vrijeme svaki dan za učenje – pa makar to bilo 15 minuta – i nikada to nemoj prekidati.

Najbolja literatura na našem jeziku

Najkvalitetnija knjiga arapske gramatike na bosanskom jeziku jeste upravo komentar medinskih knjiga koji je napisao Alim Hasanagić, neka ga Allah nagradi obilatom nagradom za njegov trud. Sve ostale knjige dostupne na našem jeziku su ili zastarjele, s greškama, prekomplikovane ili suhoparne bez praktičnih primjera. Govorim ovo nakon što sam temeljito pregledao sav dostupan materijal.

Šta izbjegavati na početku?

Ako čuješ za program „El-Arabijjetu bejne jedejk“, nemoj ga koristiti dok ne pređeš četiri medinske knjige. Taj program zahtijeva učitelja i nema nikakvog dostupnog pisanog materijala na našem jeziku na koji bi se mogao osloniti kada zaboraviš neku lekciju.

Šta učiti nakon medinskog programa?

Preporučujem knjigu „*The Dictionary of the Holy Quran*“ autora Abdul Mannana Omara. U ovom rječniku su sabrane sve riječi i glagoli iz Kur'ana, na osnovu kapitalnih djela kao što su Lisān el-‘Arab, el-Mufradāt fī garīb el-Qur’ān itd.

Pomoćni alati za učenje

→ Iskrenost u namjeri i stalna dova Allahu

→ Offline aplikacije koje sam koristio:

- [Almaany Arabic-English Dictionary](#)
- [Bosnian-English Dictionary](#)
- [Oxford Dictionary](#)
- [Arabic Verb Conjugation](#)
- [Mu'džem el-Arab](#)
- [Video – kako se arapski praktično uči](#)

Digitalna ovisnost i savremeni izazovi

Spominjem „offline“ jer želim naglasiti – iako nije glavna tema ovog teksta – da nas konstantna dostupnost internetu postepeno uništava, poput spore ali stalne ovisnosti. Najpriznatiji univerziteti na svijetu i dalje koriste zelene table i krede. Djeca postaju sve pasivnija i zatupljenija – kao i njihovi roditelji. Zaboravljamo ibadete.

Zapitaj se – kako je selef učio hatmu Kur’ana svakih sedam dana, kontinuirano i godinama? Savremena tehnologija ima svoje koristi, ali šteta koju uzrokuje – ako se zloupotrijebi – daleko je veća.

Praktični savjet: Digital Detox

Internet koristi kao biblioteku: odeš, preuzmeš potrební materijal, blokiraš i više se ne vraćaš sedmicu dana ili duže, dok ne pređeš preuzeto gradivo. Koristi aplikacije kao što su [Digital Detox](#). Ako si od onih koji troše sate na dopisivanja – shvatit ćeš za vrijeme detoksikacije koliko stvarnih prijatelja imaš. Pravo prijateljstvo ne temelji se na ubijanju vremena, nego na istinskoj vrijednosti.

Preporučene knjige za navike i fokus

- Digital Minimalism
- Dopamine Detox
- Atomic Habits
- Deep Work

✈️ Učenje jezika u arapskim zemljama

Nećeš naučiti arapski samo zato što si otišao u neku arapsku zemlju. Oni koji tamo savladaju jezik, nauče ga kroz škole i obrazovne institucije – što se sve može i kod kuće, možda čak i efikasnije. Djeca ne usvajanju kompleksne strukture bilo kojeg jezika „na ulici“ – već kroz nastavni plan i program i raznovrsne predmete koje slušaju.

Kod kuće se govori dvadesetak istih rečenica svaki dan. Pravi napredak dolazi kroz sistematsko učenje gramatike i razumijevanje jezika.

Profesor Arap često neće forsirati gramatiku, zbog čega kasnije ne znaš pravilno koristiti fethu, kesru i dammu. To nije samo moje mišljenje – identičnu stvar je naglašavao i šejh Abdurrahim, autor medinskih knjiga.

🔴 Zaključna poruka: Prestani čitati i počni djelovati

Ako si sve ovo pročitao – odmah naruči medinske knjige s komentarom Alima Hasanagića. Ako nešto ne razumiješ, poslušaj komentar na YouTube kanalu [Alim Hasanagić – Arapski jezik za početnike](#).

📌 Napomena

Ne reklamiram ove knjige zbog neke dunjalučke koristi. Preporučujem ih jer su to najpoznatije, najkorištenije i najefikasnije knjige za učenje arapskog jezika u cijelom svijetu.

🙏 Molim Allaha da ti olakša učenje arapskog jezika.

✍️ ...

☎️ Kontakt za knjige: Alim Hasanagić [00386-40-820-521](tel:00386-40-820-521)

